



Diretora PNDS Halo Intervensau Hodi Ensera Treinamento ba Enjineiru no FST iha Salaun ETDA, Dili

Enjineiru Nasional no Munisípiu Partisipa iha Formasaun Refresku iha Area Beé Moós no Estrada Rural

Treinamentu husi enjineiru PNDS Nasional no Munisípiu iha area espesializada beé moós no estrada rural hala'o durante loron hat iha ETDA, Dili (07/11/2016).

Formasaun ne'e hanesan Formasaun refresku iha area beé moós no estrada rural atu bele aumenta koñesimentu enjineiru iha area beé moós no estrada rural. Objetivu husi formasaun ne'e maka atu hare fila fali kona-ba problema ou dezafiu sira ne'ebé durante ne'e mosu iha implementasaun projeitu PNDS liga ba beé moós no estrada rural. Alende ne'e, atu aumenta liutan koñesimentu no abilidade tekniku enjineiru sira nian. Razaun fundamentu hodi foka iha area rua ne'e tanba maioria projeitu ne'ebé comunidade sira deside no implementa maka beé moós no estrada rural.

Rezultadu esperadu husi formasaun ne'e maka enjineiru PNDS sira bele kompleta formasaun durante loron hat ne'e ho partisipasaun masimu no bele responde ba sira nia problema ne'ebé durante ne'e hasoru iha implementasaun projeitu PNDS iha nivel comunidade. Rezultadu seluk maka enjineiru sira bele iha koñesimentu no abilidade, hodi aplika formasaun ne'ebé hetan ona no bele transfere fali koñesimentu sira ne'e ba Fasilitador Tekniku Postu-Administrativu sira hodi nune'e bele aseguara kualidade projeitu PNDS.

Sekretariadu Tékniku PNDS Hala'o Enkontru Kordenasaun Nasionál ba Fulan Novembru

Atu kondena di'ak liutan servisu iha baze kona-ba implementasaun programa PNDS, Sekretariadu Tékniku Programa Nasionál Dezenvolvimentu Suku (ST-PNDS) organiza enkontru kordenasaun iha nivel nasional, enkontru kordenasaun ba fulan Novembru ne'e hala'o iha hotel Ramelau, Dili 07/11/2016.

Enkontru kordenasaun ne'e rasik ofisiálmente abertura husi Chefe Departamentu Recursus Humanus (PNDS) Gina Braz ne'ebé representante Direitora (PNDS), Hanesan bai-bain enkontru kordenasaun ne'e realiza atu melhora kordenasaun servisu funsiunáriu sira ba implementasaun Programa Nasionál Dezenvolvimentu Suku iha baze.

Enkontru ida ne'e hanesan atividade regular ne'ebé akontese iha kada fulan hanesan bain-bain, iha enkontru ne'e kada munisípiu inklui mós departamentu ida-idak apresenta rezultadu progresu servisu nomós dezafiu ne'ebé ekipa hasoru iha terrenu atu nune'e bele buka solusaun hamutuk, alende apresenta rezultadu servisu nomós dezafiu, ekipa ida-idak apresenta mós planu servisu ne'ebé atu hala'o iha fulan tuir mai. Partisipante husi enkontru ne'e Kordenadór PNDS husi Munisípiu, Xefe Unidade, Xefe Departamentu, funsiunáriu PNDS, nomós Assessor Internasional no nasional, Ekipa Suporta Terrenu (Field Support Team (FST)) husi Ajensia Cardno ne'ebe durante ne'e fó apoiu ba implementasaun Programa PNDS.

PNDS

Hamutuk Ita
Dezenvolve nasaun

Janeiru 2017

Progresu

Pilotu: Remata ona

Faze 1 Siklu 1 : Remata ona

Faze 2 Siklu 1 : Remata ona

Faze 3 Siklu 1 : Remata Ona

Faze 1 Siklu 2 : Iha Etapa 10 (Sertifika, enkontru akontabilidade 50% primeirun)


Faze 2 Siklu 2 : Iha Etapa 10 (Sertifika, enkontru akontabilidade 50% primeiru)

Faze 3 Siklu 2 : Iha Etapa 3 (Transferensia Fundus Operasional)




Prioridade sira Iha Nasional

Faze I Siklu 2



Faze II Siklu 2



Autoridade lokal Hamutuk ho Ekipa Jestaun Suku iha Munisipiu Aileu Hala'o Avaliasaun ba Implementasaun Programa PNDS Durante Tinan 2016

Avaliasaun annual ba implementasaun programa PNDS iha Munisipiu Aileu iha tinan 2016 hala'o iha salaun Timor Klaran Aileu Vila (06/12/2016). Diretor Delegasaun PNDS Munisipiu Aileu, Abel da Conceicao informa katak avaliasaun ne'e hanesan aktividade annual ne'ebé hala'o kada tinan atu bele hare progresu no dejafiu iha implementasaun programa PNDS durante tinan tomak. Tuir Diretor Delegasaun katak husi avaliasaun ne'e mak ita bele diskute progresu no dezafiu ne'ebé ita hasoru durante implementasaun tanba husi dezafiu no progresu ne'ebé ita hasoru maka ita bele hetan referénsia no informasaun ne'ebé sai hanesan lisaun ba implementasaun programa PNDS iha tinan tuir mai.

Iha parte seluk Presidente Autoridade Munisipal Aileu, Joao Tilman do Rego konsidera Implementasaun programa PNDS iha Munisipiu Aileu hetan susesu bo'ot tanba iha koperasaun diak entre comunidade no Ekipa Jestaun Suku hodi implementa Projetu ne'ebé sira rasik decide atu hala'o iha sira nia suku. Alende hala'o avaliasaun iha oportunidade ne'e mos Autoridade PNDS Munisipiu entrega mos sertifikado apresisaun ba Suku ne'ebé melioramentu iha implementasaun programa PNDS iha Aileu mak hanesan Suku Fadabloku, suku Bandudato no Suku Manucasa.



Sekretariadu Tékniku-PNDS Fasilita Work Shop Nivel Munisipiu Kona-ba Partisipasaun no Hakbi'it Maluk Feto Iha Implementasaun Programa PNDS

Workshop ne'e hala'o ho objetivu atu fahe istória susesu no lisaun pozitivu husi comunidade liu-liu maluk feto sira nia partisipasaun iha prosesu dezvoltamentu comunidade iha PNDS. Workshop ida ne'e hala'o iha Salaun João Paulo II, Comoro-Dili (06/12/2016). Iha workshop loron ida ne'e maluk feto sira fahe esperensia lubuk ida kona-ba susesu involvimentu feto sira nia iha dezvoltamentu komunitáriu iha implementasaun programa PNDS iha sira Suku.

"Hau luta maka'as ba proposta beé mos iha hau nia Suku laos ba hau nia an, maibé comunidade sempre halerik ba beé mos, tanba sira asesu ba beé mos iha fatin ne'ebé dok." Hato'o husi Maria Manuela Castro, hanesan membru Ekipa Jestaun Suku (EJS). "Maibé agora di'ak ona tanba bee mos besik ona iha comunidade nia let," nia haktuir.

Iha parte seluk, maluk feto balu apresia tebes ba implementasaun programa PNDS, tanba iha programa ida ne'e la'os deit atu responde ba iha infraestrutura bázika iha Suku, maibé kapasita mos sira atu bele sai hanesan lider iha sira nia Suku. Elmalda da Costa, antes ne'e hanesan comunidade bai-bain iha uma deit, nia hanesan ema ne'ebé nonok, moe no kbiit laiha atu koaliala iha ema barak nia oin.

Atu hetan informasaun :
www.pnds.gov.tl
info@pnds.gov.tl

Atu fo imi nia hanoin:
keixa@pnds.gov.tl